

四庫全書

集部

欽定四庫全書

夢澤集卷八

明 王廷陳 撰

詩

贈鄭少谷

汝昔辭郎日堂齋谷口尋經年種松菊攜客遠登臨澤
傍蛟龍窟巖穿虎豹林朝朝泛烟艇夜夜宿雲岑竟被
蒼生起俄驚白髮侵屢遊天姥夢時動越鄉吟障貌東

南美琴留山水音乾坤倦鳥翰歲月狎鷗心骭髀違朱
紱踈慵本素襟異時筋力在去矣極高深

寄李子中

汝病謝含香歸歟卧草堂庭趨候杖屨林憩訊松篁種
藥春登圃尋源夕泛航猶憐臺館地不負芰荷裳屈宋
元悲楚鄒枚舊賦梁卑棲愁燕雀高起羨鸞鳳琴憶風
流調詩留倡和章因君嵩少去吾亦念滄浪

石齋

巨石連天起崇威壓棟隆南陽卧龍地西蜀草玄翁洞
鑿峨眉闢根穿海竅通過雲開錦繡宿霧隱玲瓏潤助
琴書色明添檜柏叢春垣牽紫蔓秋壁映丹楓淇澳常
如琢他山信可攻堅貞君子德磊落古人風錫磬懸周
廟為渠峙漢宮玉衡當萬國蒼珮冠羣公鎮靜為磐久
精靈降嶽同江河屹自障瓦礫舊曾空作礪商家日和
釣夏府中升堂愧未可瞻仰借磨礪

寄韓道人

吾愛飛霞子，餐霞卧葢宮。
時將黃綺曲，高詠紫芝風。
洞草秋生細，壇龍晝護空。
丹應九轉就，地與十洲通。
玉樹扳何及，青牛望不窮。
因君惠羽翰，自此脫樊籠。
獨鶴冥冥去，相從碧海東。

四兄宅守歲

作客憐兄並，吟詩悲歲歸。
久沉金馬詔，俱惜彩衣違。
風戶沙潛裊，春筵燭自輝。
棲烏終不定，宿鴈且相依。
側識凌雲思，旋看比翼飛。
盤椒遲明發，池草慰晴暉。

初至郡齋作寄所知

刺史章初綰交遊迹已睽
質隨江北化諾與汝南齊
牒吏窺松逕輿人候藥畦
藉膏期不潤戴李保無蹊
葵準公儀拔棠如召伯棲
踈慵優記馬奮激劣啼鷄
那敢蒼鷹效頻將白鶴攜
宦情緣病少鄉夢被愁迷
投効終如范不堪誠類嵇
何年衡嶽上初服遂攀躋

遊鍊真宮

羸女吹簫夜青鸞作遠遊
已邀明月上空遣彩雲留
石

路遊人惑瑤編方士求桂巖間白鹿蘭谷卧青牛海嶽
丹丘閱風塵素髮愁壇霞秋自落洞日晝長幽冠蓋乘
閒出琴尊倚道流罷官終欲去桃李弄漁舟

已罷視事上官密令拘齋中禁弗得出悵憶故山
有作

弱冠才殊調明時藉早通蒼茫收印綬留滯嘆萍蓬變
色休談虎逢嗔失避驄鷄猜玉餌鸚鵡恨雕籠散帙
窓前草吟詩井上桐風簷窺暮雀月砌響秋蟲隱霧徒

慚豹隨陽祗羨鴻齊臣歌白石楚客怨丹楓
籬採黃花
候山攀桂樹叢羈心傍汝漢回首隔雲夢
山水鳴琴外
烟霞岸幘中安能似張翰乘興去江東

張子言家難遠來視我命酒偕酌述往感今殫陳
苦狀復劇談越中山水約以釋縛後共遊焉

憶折燕山柳驚看漢苑花我今悲下獄君已嘆無家
躑躅誠如此依違並可嗟遠遊緣避地作賦擬懷沙
越國心常往高談興轉賒軒紫滄海日觴泛赤城霞
遠水龍

蛇渾中原虎豹譁明朝拂衣去共子看浮槎

獄中言懷呈諸知己

未敢言先閥何由免後災償金奚俟辨亡璧竟難裁
畫地期無入書空意頗哀南冠琴奏切北斗劍光回
雲路悲垂翅河津忌曝腮危機隨處有蟄戶幾時開
玉獻翻為罪珠投轉見猜信然非木石何以動風雷
實少龍蛇德虛稱鸚鵡才願吹鄒子律一為暖寒灰

被繫以詩呈諸友

鬱鬱心難白紛紛口奪朱約威憐檻虎局促效轅駒門
客寧持璧鄰兒豈竊鉄人言傳大過吾志抱中孚孤憤
韓公子離騷楚大夫逢人多按劍知己亦張弧跡困神
逾泰時危德靡孤參乎非不肖慈母勿先逋

出獄留別主人兼欲有貸

畏途殊倚藉歧路暫相看生死交情見飄零客計難原
思寧是病范叔果非寒有玉嗟三獻無金報一餐涸鱗
斗水活窮鳥一枝安莊鳥吟何切馮驩歌未闌平生流

水引不惜向君彈

過杞同袁明府避暑學宮席上贈袁明府及諸廣

文

過邑逢仙令開尊藉廣文宮牆迴赤日冠蓋擁青雲
俎豆初筵秩絃歌幾處聞池芹香細細庭檜鬱紛紛
鼓瑟窺賢擬彈琴引帝薰堂開矜鱸集客散悵鳬分
百拜難成醉殷勤此謝君

南歸道上作

予後疲梁甸言旋傍楚宮蓬心漂泊苦劍氣嘯歌雄跡
異周南史情同塞北翁悲風欽代馬逐暖學邊鴻家遠
翻憐僕途迷或訊童從今歡稅駕達者豈稱窮

初歸故園二首

結髮負奇志辭家作遠遊一言侵絳灌萬死脫幽囚倚
伏虛疑鵬光芒隱射牛敢云疲漢戟實已散秦裘習隱
希玄豹忘機對白鷗生涯惟素業吾道已滄洲

其二

富貴雖非願歸來猶抱慙祗緣頻觸網敢謂早抽簪
進退兩無據迂踈七不堪何妨流俗笑擬向達人談志業
總虛擲艱危誠飽諳逃名棲市井投跡慕江潭

病後過王生宅

王生年最少結屋面江灘白鳥當堦下青山背郭看軒
楹抱水石枕簟落風湍草色侵書幌波光蕩藥欄緣君
得無恙來共把漁竿

贈張汝霖北上

吾國張平子風煙守釣磯思玄才不忝拾紫願多違是
出輸芹曝非聞厭蕨薇交遊行贈策妻子走牽衣試問
登燕隴何如息漢機韶表季子去駟馬長卿歸薜荔懸
初服松筠隱舊扉獨憐垂老日更逐斷蓬飛

寄劉松石

鎮擁三邊重銜兼八座榮韜鈴臨玉障仁義即金城神
武雖無敵天威亦有征塞烟烽裏合隴月笛中鳴直應
師方壯恩驅命始輕何云無上策已見戢佳兵虎豹爭

為用風雲立可生書隨飛箭去檄至倒戈迎百勝非天
幸諸戎不日平橫行邊地拓獨坐塞塵清質子趨周道
降王詣漢京歌鐘時自勞戍鼓遂無驚定遠元投筆終
軍枉請纓不言防衆忌求退為功成但使龍庭滅寧邀
麟閣名

過陳處士故居

偶緣幽事步因歷故人居薄暮鄰家笛流塵滿室書琴
亡人與化舟去壑成虛磯憶投竿處林傷挂劍餘空堦

積苔蘚寒渚落芙蓉
草亭仍在青雲業已踈
昵交存
僅半為爾立躊躇

懷京邑諸舊

昔感同袍義長懷
結綬情雲泥乖末路
江海畢餘生忽
覩繁華歇寧期腐草
榮臨池思贈鯉倚樹
聽遷鶯幸爾
安愚拙居然負聖明
因風訊知己歌此代
悲鳴

寄應立齋郡伯

君家越嶠外為郡楚山阿
官已二千石年初三十過
理

人去泰甚樂職布中和操割方時少循良較古多一言
唯有怨衆口詎無苛簪筆評因誤持衡聽屬訛遂令長
者黜將謂至公何歸路經山海幽居寄薜蘿所歡息奔
走其憚費吟哦去後思彌切從前頌匪他良規存故吏
遺植護新柯愛比羊公碣清傳漁父歌唯餘田野議功
德庶難磨

重晏魏子池亭兼約再遊

與子接林閭頻過逕不除歲華奄及此物態已非初流

水逢君奏閒雲向客舒高譚俱用馬偶坐或觀魚席促
情無間尊移興有餘歷畦窺種藥經穴訊藏書待月留
應久迷花出每徐人嘲揚子宅自負葛侯廬不去憐佳
境重來慰索居少年交易盡長日會難踈

自三台河泛舟至鳳巖

嘗蓄水雲興茲乘風日和纜牽仍擊汰棹輟且隨波竊
慕太公釣猶欽孺子歌野風散蘭杜潭影翳藤蘿曲岸
行逾近支流入轉多蟲魚衝艇躍鷺鶴狎人過漸覺傍

洲退迴看遠岫羅詭容緣爽出逸思向空摩嚴子瀨若
此秦人源匪他再來津恐失歸路奈愁何

題槎隱其兄為索

秋城逢謝客為道惠連賢湖海將書劍風烟泛舸船生
涯如范蠡遠意學張騫歲訪支機石予慚賣卜仙高蹤
一回首鬱鬱斗牛邊

文甫席上

宴集當寒景賓朋盡楚材祇緣鄉土樂翻重歲時哀臘

意懸江柳春心倚檻梅香醪非市得珍果況闌來甸雪
冬堂淨城氛夜館開自憐同落葉誰為暖寒灰日月惟
丘壑英雄半草萊平生鴻鵠志燕雀莫相猜

題陳子隱居

愛君多野興築室傍溪源霜月蘆花映香風蘭葉翻卧
聞春水至坐聽榜人喧鷗鷺何多喜龍蛇但久蟠臨流
傷逝者達命願終焉素業江鄉在高情栗里存楊林垂
釣艇苔徑讀書軒雲疊窗中岫霞開石上尊蒼藤薺刺

壁綠篠半遮門豈厭漁樵侶惟耽場圃言園秋收芋栗
村晚納鷄豚歲月老將至襟期誰與論應知岩洞裏別
自有乾坤

席上贈吳氏賢子

豪士百憂無生兒風骨殊入門看寶劍照室動明珠盡
日提攜意華筵賓客娛千年龍有種一曲鳳將雛學步
猶防蹶看人豈解呼暫時棲玉樹他日取長途垂老江
湖上生涯樂餌扶一持還一笑真是慰馳驅

送蕭子歸

不謂風雲變能為江海行
鯨鯢駭浪日蘿蔓附松情
開國梁朝系承家漢相名
淹留聊隱豹登眺幾啼鶯
夢掇廬山秀帆辭洛水晴
嵩雲流古苑河氣幕炎城
出璞寧三獻驚人想一鳴
他時杖屨地東道倘相迎


李道士房呈張子

嗟我何多難無時不憶公
蒼茫神劍合羞澁客囊空
失路人俱棄餐霞孰與同
何年當戢羽萬里各飄蓬
楚澤

行歌外燕臺旅望中斷金諧老友煮石學仙翁
畫色翻堦藥宵聲響砌蟲閉門苔蘚徑露頂薜蘿風
洞裏燒丹竈花間使玉童十洲應不遠從子謝樊籠

經光山晚宿寺中王汝希過訪喜作

龍宮膽郭外鷺嶺落城隅傍樹疎燈出緣溪晚騎趨
珠林旋皂蓋竹戶擁緇徒海內誰相假君來意不無
屯遭勞藉慰闊絕倍歡娛萬里排雲翼青春汗血駒
雅懷憐孺子高論惜潛夫蘿月紛紛白松雲黯黯孤
蒼茫登覺



夢澤集卷八

路悵望出迷途日月辭三殿風烟下五湖辛勤陳往事
邂逅即良圖後會應無定寧辭酒重沽

季夏遊赤壁偕子言諸公

六月軒楹敞三分割據雄江迴城抱日艦火岸餘風詞
賦留天上旌旗在眼中霸圖俱已歇幽賞幾回同檻外
鳬鷗亂尊邊雲霧通松杉盤虎穴臺榭接龍宮早歲辭
朱紱茲遊感數公願言攜桂楫常比狎漁翁

欽定四庫全書

集部

夢澤集卷

九至
十二

詳校官中書_臣葉元符

中書_臣劉源溥覆勘

總校官進士_臣朱 齡

校對官編修_臣潘曾起

謄錄監生_臣周敦復

欽定四庫全書

萬澤集卷九

明 王廷陳 撰

詩

視江子疾樓上作

朝回駐馬問江生病愛樓居面雨城涼晝白雲流翠簾
清秋玉露望金莖馮欄轉動層霄興伏枕翻思萬里行
天遠時危俱涕淚南山空美紫芝榮

雨中宿張子言家因示我苦雨之作

高士衡門遠市開
閒官羸馬踏泥來
雲重檻落秋城色
溜急堦傳暝壑哀
隱霧即看文采變
愁霖真羨古今才
滄波共看浮槎去
肯傍燕關望楚臺

遊西山作

西山憶昔宣王幸
幸罷千巖御氣留
金界尚看金殿峙
玉泉長接玉溝流
君王水石遊人重
畿甸煙花賦客收
天上翠華無復度
五陵松柏迥含愁

送劉郎中養病歸

日含鷄舌侍龍顏，多病連章暫乞閒。
解印忽看辭漢署，拂衣長嘯出燕關。
為郎苦節雲霄上，倦客春心藥餌間。
帝里故人臨路訊，冥鴻何日向鸛班。

京邑言懷寄所知

十載為儒愧未成，一朝謁帝荷知名。
每緣簪組思初服，轉向班行憶舊盟。
斥鴳蓬蒿聊自適，爰居鐘鼓但悲鳴。
寄言漁父莫相笑，早晚滄浪歸濯纓。

裕州命下悵憶故山有作

吾家村巷枕丹谿野色平開萬木齊
晝卧雲林啼虎豹春隨煙艇散鳬鷺
符從天上新分竹杖憶山中舊策藜
早晚便應投劾去鷓鴣元慕一枝栖

獄中作

嚴譴當年出漢京幽囚今復滯梁城
計疎妄擬城狐獲謗重俄驚市虎成
削木倉皇期勿對戴盆天日豈能明
鄒陽痛哭題書地今古誰憐共此情

出獄後作

孤危心迹竟難明
俯仰悲吟恨未平
失馬詎能窺倚伏
解龜聊得廢將迎
嵇公釣弋從吾好
翟氏賓朋任世情
未信星辰虛寶劍
且從江漢濯塵纓

經汝陽雨中馮太守邀飲

屨宇雲深五月寒
眼驚簷溜忽鳴湍
不緣地主賓筵盛
那得天涯旅况寬
散帙但吟神女賦
移舟須上使君灘
聞歌漸覺鄉音似
家近寧嗟行路難

初至故園作

久去園廬頻入夢乍瞻桑梓尚含悽
朝簪昔忝雲間出世網今逃鳥任栖
舊製芟荷猶在笥不言桃李更成蹊
且便越鳥謠吟苦敢擬蒙莊得喪齊

即事

楚國村墟煙霧裏春天門巷薜蘿間
柳條到地可攬結燕子定巢頻往還
新水潺湲遵故渚歸雲縹緲戀家山
生涯甘傍漁樵侶世事虛傳鷓鴣班

寄顏惟喬

平生坎壈真憐汝，一代文章實起予。
處士尚憂江夏禍，長卿新著茂陵書。
白雲在眼期乘鶴，滄海無心學釣魚。
楚岸風花暮無數，看山何日枉吾廬。

寄吳子

汝謝郎官，今十年。家貧樂事未全捐。
門前已有先生柳，郭外元無季子田。
弔古遠遊張樂地，尋幽還上問津船。
瀟湘樓閣晴無數，春日留題遍楚天。

夜酌龍蟠磯頭

大江之半石崖栽石上樓臺蕩碧波沙淨鳬鷁依檻泊
月明舟楫逼筵過中流擬接鮫人室深夜猶聞漁父歌
危坐轉驚銀漢上幽棲翻厭碧山阿

江子景孚書至云將以使命下沔鄂訪予大江之
濱因而寄此

久即林臯耽習靜每從京洛念離羣仙人黃鶴長相待
學士銀魚未可焚舟際岸桃晴映水屐邊巖桂晝棲雲

呼兒預飭登臨具翹首星槎候使君

春日過四兄溪邊草堂奉懷一首

已傍煙霄開畫省獨留雲壑掩柴門
天邊鴻雁春先起江上鳬鷖暖自喧
馥馥汀蘭愁賦客萋萋徑草怨王孫
謝池莫漫懷羣從漢署長應奉至尊

寄顏子

爾家何在漢川湄碧石青蘿晝雨垂
溪聽採蓮諸女曲山謠攀桂八公辭
即同沙雁防增繳為愛江鱸理釣絲

貧病經年思見面鶯花三月與君期

室成

十年踪跡困塵埃小構堂齋闢草萊
康樂石門躋險築少陵茅屋避諠開
畹蘭籬菊幽香入煙柳霜梧歲色回
燕雀衡門馬足賀求羊三徑喜頻來

許武昌邀飲西山寺中席上贈郭吳二部使

邑宰張筵臨澗壑省郎並馬入煙霞
慚予一著登山屐愛爾雙停上斗槎
石磴坐來秋蘚漬金宮禮罷夕陽斜

冠裳暫喜同香岫燈火先愁散遠沙

其二

軒騎並從金刹駐絃歌遙向碧山聞巢邊鶴鶴窺遊客
行處漁樵識使君絕壁松杉含晚照緣巖樓閣綴秋雲
賓朋萬里過逢地惆悵風前落葉分

寄江夏白鶴子

吳郎自號白鶴仙老去清狂更可憐詞翰獨矜桃李詠
賓朋多慕竹林賢悲歌擊劍臨風起痛飲登樓對月眠

跌宕飛揚寧自惜奇蹤俠氣任人傳

答許子

衡嶽峻增落楚空瀟湘秋水與天通已從波際瞻遊女
更向雲間禮祝融萬里煙花詩卷裏十年岐路淚痕中
擬將壯觀供傾蓋莫遣浮生嘆轉蓬

病卧書懷

深秋偃卧大江濱檢點襟期愧達人猶計桑麻元逐世
竟嬰婚嫁豈閒身風城去雁寒逾急霜戶鳴蟲夜轉親

遲暮不堪仍疾病夢魂時復落風塵

秋夜宿龍蟠磯寺中

三山海上但虛聞茲境真憐禮佛勤石勢參差蟠水府
金光縹緲出江雲龍宮深壓鼉鼉窟鷺嶺孤迴鶴鶴羣
向夕繩牀難假寐天花汀葉鬬繽紛

蚤出待許子

閒居盡日棲林谷遲侶侵晨出郭門沿溜舸船穿宿霧
枕山樓閣上朝曦交遊四海誰能念出處當年子試論

久息漢機甘落魄無煩楚些續招魂

舟中聽張子魚歌奉贈

清秋染翰在江船留客高歌對酒筵
風振雲林時颭颭岸迴石瀨故濺濺
丹霄鶴唳牙樯側碧海龍吟玉笋前
已激壯懷頻鼓鉢不勞別調更鳴絃

過周子書屋

名園曲轉清江上精舍遙連翠岫傍
閉戶時人占豹隱抽毫流輩讓鷹揚
父貽素帙頻開篋賓問玄經屢命觴

虛白向宵如畫色鄰燈何必借餘光

送內兄謝虞輔之任

一官特起中丞裔故里頻留弟妹情老憶射屏曾中雀
春憐出谷忽遷鶯箕裘坐使家聲振彛鼎行將祖德鳴
岐路柳條那忍折門闌蘿蔓故爭縈

秋泛三台河同魏范諸子

賦客蕭晨此並來衰年勝地幾傳杯蒹葭水落魚龍冷
島嶼風驚雁鶩哀漁艇縱橫秋岸合遊軒雜沓暝原迴

疎林忽送青天月沙色波光萬里開

宴月川宅留贈

將軍好客暮相延銀燭朱光散綺筵
勸飲鳴絃憐子夜談兵拔劍睨遙天
朔方戎馬驚心後南國賓鴻短髮前
莫遣壯懷隨逝水擬圖生像上凌煙

寄馮三石

馮公性氣本飛揚歷詆酣呼衆莫當
處士久緣才見忌步兵聊寄酒爲狂
一丘曲折藏花徑萬卷縱橫堆草堂

獻歲風煙倘乘興隨君理棹下滄浪

冬夜懷童子

四海何人契最深百年幾度遂追尋
褊心自信朱絲直病骨誰憐素髮侵
干戈無能行抱甕思君不寐起鳴琴
風江歲杪舟難進書報吾生久陸沈

夜酌舒陳二子

江城暝色靜柴扉遊子冬殘悵未歸
過雁夜分猶共逐飄蓬天末故相依
壯心久客羞彈鋏高義今誰為解衣

酒罷出門俱勿嘆古今奇士遇全稀

胡謝二子過訪

結廬非僻晝常閒桂樹中庭幾自攀
乘興不期朝命駕聞歌未竟夜留關
一觴草具來堪數三徑花深出每慳
少小相看今已老君如不飲負衰顏

戲東落魄子

落魄先生太古民頻年寄食楚江濱
浮踪暫止終難定野性從來豈易馴
垂老獲妻寧計醜浹辰喪女頗傷神

田文好客黃金竭每食無魚幸勿嗔

懷鄭子

鄭子客遊淹吾廬詩詞間作真起予憶當出門與結束
欲別上馬仍躊躇計日能迴楚水棹經年竟斷燕關書
人生岐路恨南北塵暗望眼何由舒

病中武昌二客過訪詩以贈之

雙扉寂寂候暄開二客翩翩並馬來雪岸叢梅行故傍
風江亂葉去仍猜壺觴力疾歡難竭林谷經寒響易哀

他日如追今日興吾堂須記古城隈

宴集楚藩樓上作

別館張筵臨水上危樓改席向天中
窗含江漢澄流盡檻俯衡巫遠勢通
鳴珮忽沾神女雨披襟時拂大王風
梁園勝事今非異楚國文儒古亦同

村晚

天時人事催寒景坐嘯行吟到夕暉
錦樹高原去鳥疾蒼苔小徑行人稀
牧兒谷口驅牛入獵伴沙頭得雁歸

雙戶畏人時獨掩寸心回首願多違

春陰

兩月陰霏苦不開一春門巷客稀來
風花狼藉惜將盡煙草微茫望屢迴
萬事日非長閉戶百年今半且銜杯
江湖遠適非吾興泥淖深棲祇自哀

病起

經旬伏枕艷陽天病起藤蘿遶戶縣
少日親交魂夢裏一春花鳥淚痕邊
緣溪力薄依人步課圃情多警豎眠

天遣此生無俗累書籤藥裏任年年

病起過魏園二首

卧病顏鬢憐予改力疾池亭為子來隨處琴尊臨水石
任情歌吹入莓苔禽魚狎客晴偏聚花藥娛人晚競開
共惜羣芳行欲歇莫辭中夜醉方回

其二

病後名園擬散愁春晴聽鳥特相求月前敢料能今晏
年邁偏令重昔遊擲管訊花吟復立扶筇經樹步仍留

平生霄漢誰青眼一斥江湖已白頭

山莊漫興

青松鬱鬱屯青靄翠竹森森傍翠微近日頗諳農圃學
衰年寧負芰荷衣風簾乳燕衝人入霧渚驚鴛挾子飛
且對春光成一醉莫將身世恨多違

席上贈方士

仙客芝田傍白雲偶遺鶴馭到人羣酒酣射覆多奇中
歌罷談玄總異聞仗劍向幽驅鬼物焚香當畫下神君

人間妙術渾難盡欲續齊諧志怪文

病後客過有贈

病骨旬時虛酒筵壯心激烈嗟暮年秋堂過客擊柝後
寒渚哀鴻吹笛邊尊壘當戶映初月松桂傍人生夕煙
與君一醉緩世慮深夜敢辭吾欲眠

試巾

老態侵陵短髮知強顏結束試巾時向人雅協漁樵侶
顧影何慚丘壑姿新月舉頭從一墮過雲送目任長歌

古來高士誰堪效折角風流是我師

客有以琴書謁予者賦此贈之

逸客野服自何所抱琴搦筆叩我扃
朱絲試彈清廟曲白鷺聊寫黃庭經
委心天地盡吾土浪迹江湖真客星
眼中二藝誰過汝有此已足垂芳馨

移菊

老營秋圃心偏愜曉趁春陰手自移
欲保弱荻全宿壤旋鋤蔓草揀踈籬
餐英望飽三閭腹縱酒謀充九日資

直與煙霞添晚色更隣松竹稱幽姿

江上待友人不至

失侶哀鴻號近渚超羣良馬出長途經年書札離心滿
竟日帆檣望眼孤雪後江湖翻浩蕩春來雲雨益虛無
不堪惆悵燕京別兼阻提携楚地娛

周都閫歸長沙寄贈一首

將軍長揖出江城笑解兵符野服行制敵無慚古名將
談經元逐魯諸生桑榆日短歸何恨薏苡天高謗莫明

衡嶽洞庭收壯觀玉闕銅柱謝浮名

贈李子

青春君已動才名歲晚官卑俗所輕
車案囊螢元世業
翟門羅雀自人情
貧緣嗜酒愁心失
病屬攻詩老態成
莫謂儒冠身竟誤
由來清苦是家聲

談生墨竹人擬夏卿點染石蘭猶稱獨步予欽絕

藝聊贈斯言

畫師好手久寂寞晚有談子能孤騫
心機妙入此君室

足跡徧謁諸王門自從屏障得汝筆忽驚瀟湘來我軒
更煩拂素寫蘭杜靈均千古留芳魂

贈玄谷子

日者在昔多隱賢年來似子稱通玄予今五十豈知命
汝困湖海空談天閉肆潛窺斗宿外被褐長揖公卿前
吾鄉名流頗氣岸往往卷內留詩篇

館賓李子之歸也詩紀別懷兼訂來約

歲晚江寒木葉稀一尊臨水送君歸携書莫厭生涯薄

拂劍頻驚壯志違，絕壁孤雲開曙景。
亂山足馬傍殘暉，相期轉眼王正月。
笑領諸孫啓竹扉。

贈邵格之

清江落日片帆來，野老柴門向夕開。
四海風煙雙短劍，百年天地幾深杯。
圖書靜室幽人興，鼓角寒城遠客哀。
旅雁賓鴻隨去住，楚雲吳岫各徘徊。

宴集赤壁書懷

春深遊興屬芳洲，選地張筵對狎鷗。
赤壁逕盤危磴出，

青天城抱大江流，乾坤久厭三分業。
山水仍含萬古愁，客散晴沙樓閣晚。
佛燈漁火共悠悠。

過玄妙觀有贈

神君樓閣枕江濱，鐘磬時時霄漢聞。
仙至忽逢青鳥使，賓來頻舉白鷺羣。
當筵揮瀝皆成雨，煮鼎飛煙盡化雲。
雙鬢向衰渾欲盡，洞天石髓若為分。

遣悶

萬事驚心傷老大，一春生理屬艱難。
鶯花歷亂轉無賴。

林塢棲遲殊未安學圃避人長抱甕應門報客旋求冠
年來相信唯鷗鳥引子窺魚近釣竿

其二

病起衰顏聊自媚春深笑口向誰開五男不學從渠懶
三徑俱荒阻客來日展琴書娛潦倒雨拋巾舄漬莓苔
交游物化今餘幾倚杖看花首重回

夏日宴集宋寶山別墅留贈三首

先生堪擬葛天民築室郊原遠市塵客歎閒門驚稚子

自分餘酌到農人朱華冒日明棊局翠竹含風撼角巾
不覩少微雲霧裏楚江誰信有垂綸

其二

城闌未盡忽田家心遠林塘近不譁往事仍栽彭澤柳

故人分種洛陽花

圃內洛陽花二種陶
子移自桂林者故云

看山倚杖移長

畫拂石開尊駐晚霞莫道尚平婚娶畢更勞耕稼送年

華

其三

丈人屏跡此林中，開徑唯將蔣詡同。
地靜鳴筇窺鶴鶴，日高隱蓐任兒童。
巾車欲返貪乘月，枕簟頻移遣就風。
向客舉觴渾不盡，料君餘興屬鄰翁。

贈鄭子南濱

昔辱風塵為傲吏，近精詩賦擅宗工。
多情好客頻謀醉，苦節逢人不諱窮。
事去壯心存老驥，愁來矯首向冥鴻。
慚予幸托交游後，鄉里聲稱迥未同。

贈陳子槐野

蚤歲君才過一時儒冠白首竟傷悲
圖南久擬冲天起
戰北從知值數奇
閉戶交游今漸絕
傳經童冠日相隨
老夫偃蹇同心事
攜手蒼山歌紫芝

對鏡自嘲

晨理白髮臨青銅
乍對翻疑何處翁
童心未除驚貌改
壯志不就悲途窮
五嶽擬遊誰縮地
一丘偃卧閒書空
極知老醜安用爾
攬衣起舞仍豪雄

對鏡自慰

年當知命轉多憂蒲柳俄驚颯已秋衰鬢自今慚朗鑒
福心元不怒虛舟雲霄日起非先達泉壤年來半舊遊
老子生涯良已足加餐痛飲莫他求

竹樓重修落成桐岡郭君以詩見示作此答之

有序

竹樓之敝其來久矣桐岡君治黃之二年百姓之
急既紓境內之廢漸舉遂因財力之餘新而葺之
覆易以陶榜仍其舊匪乖作者之意聊為可久之
圖蓋精蘊之求嗣豈色象之是泥哉君每退食自

公則登茲遲客或馮欄寓目或抽翰泄悰湍瀨滿
聽蒼翠漬几乃知江海之興悉歸癖宇之間魚鳥
之娛雅佐羔羊之節茲吏隱之攸寄非塵坱之能
逮也况登高能賦共推大夫之才而欲報不成將
難郢曲之和乎

竹樓占勝城頭出郭子為邦海內聞仍貫舊題應不改
治絲新政自無焚雲霄懸榻緣高士島嶼開簾近使君
誰信喧囂官舍裏煙霞與客日平分

寄答王子新

有序

昔淹梁獄獲交子新於時厥考視學中州君方貴
遊况當英妙而予辱在糞土乃能抗違衆怒顧我
圜扉見其雋才偉質綽有父風况又旁通六藝下
逮諸家妙善悉臻雅俗兼舉良由神解匪假師資
予固意其驥羣必空鴻達夙漸矣未幾予遂竄伏
江濱君亦棲遁白下予已長為不然之灰而君竟
托於無用之木垂蹇之跡偶爾齊同昭曠之懷曾

何芥蒂所嗟吳楚殊方衰頽各迫愧乏嵇公之駕
勇絕伯子之絃忽攬贈言茫如見面因念分携以
來二十六載矣一時昵交半化異物而吾與子新
雖因蓬蒿猶免溝壑豈非遭如之稍幸不足之可
矜哉難為俗言聊用自慰悲懷強抑報章晚成

河上逢君英妙年吾家逸少早知賢別來落落貪毫素
客過時時問草玄岐路飄零交有自殊方遲暮見無緣
開緘忽憶艱難日一度長吟一惘然

壽孫毅菴京兆八十公常為給舍

丈人七十棄簪裾十載高踪海上廬謝客風流詩卷裏
鏡湖煙水釣竿餘中朝諫草焚應盡南國甘棠愛不踈
莫謂石牀眠已穩直愁門外候安車

奉贈桐岡郭侯考績北上

依依山郭枕江流藉藉專城頌細侯高士獨過頻下榻

公即竹樓為禮賢堂
復偏其下曰下榻處

自公多暇一登樓深恩久結黃人

愛苦節真分漢主憂躍馬忽看朝帝去攀轅何計望君

留

秋夜奉簡浚川先生舟次兼酬留贈之作

獨舸高秋動旅寒
晚憐旌節駐江干
城迎月浪層層白
岸匝霜楓裊裊丹
夜玉光留居士
里沙鷗眠傍使君灘
不緣病卧妨尊酒
秉燭常陪挹渚蘭

病後答友人

一畝居連郢客鄉
三年愁隔漢川長
青山各有幽棲志
白雪遙傳寡和章
自傍雲霞開藥圃
不將塵土灑荷裳

洞庭雪後煙波闊
花底乘舟到草堂

偶題

病起江湖復早春
黑頭何愧此閒身
行歌白石嗟齊相
笑詠滄浪憶楚臣
拄杖雲中穿薜荔
鳴琴煙裏坐松筠
溪邊不必秋風起
自有魴魚色勝銀

夢澤集卷九

欽定四庫全書

夢澤集卷十

明 王廷陳 撰

詩

贈張子

愛爾清狂甚兼之才調殊不須愁貝錦已是握靈珠
放魚

欲作銀絲鱸翻憐錦鬣殊滄波放爾去何用報明珠

月夜嘆五首

度牖含風色懸樓轉雪輝
天邊照羈羽不比鵲南飛

其二

明月歲如此青楓再改顏
故山有叢桂悵望幾時攀

其三

莫謂高棲穩高棲翻累軀
清光逼禁樹樹樹有驚烏

其四

玉闕同一照玉鏡幾迴圓
莫作征人婦高樓長自眠

其五

萬古關山曲仍傳笛裏風中宵報烽火殘魄倚張弓

雜述八首

冬林覆草閣兀坐雪雲停避世棲金馬無人知歲星

其二

日高不盥櫛搔首行且歌飛來避繳鳥戢翼盼庭柯

其三

予本瀟湘客不作瀟湘遊援琴奏流水寂寂帝妃愁

其四

南人慕炎方歲宴寡所歡雖有千金裘不禦北風寒

其五

出門乘欵段中道值權璫黠校四五徒前驅何爾強

其六

清晨謁承明百官仍依依迴立訊中使君王何時歸

其七

對酒願一醉醉後忘悲辛憐予亦楚產不似獨醒人

其八

哀歌撫劒匣雄劒且莫鳴風雲倘不負仗爾事橫行

溪邊草堂雜詠六首

鼓楫遵花嶼捫蘿憩草堂門添新竹檻壁挂舊荷裳

其二

芋葉深藏徑荷花淺覆艘堦除馴白鳥村巷接清江

其三

觸荇鳬雛沒穿籬竹笋苞渠壅更鑿石屋破自誅茅

其四

日出扉初啓風生席屢移當窓交碧樹隔戶響黃鸝

其五

晨徑露縈草午園風振條鷓鴣窺浦淑翡翠集蘭苔

其六

孤石堪垂釣清流可濯纓沿迴終日興偃卧百年情

元夕雨四首

元夕人間重冥冥暮雨聞眼前歌妓散疑是楚行雲

其二

結伴非無約張燈亦有情春光妬羅綺不放此宵明

其三

歌吹催春事風光預可賒請看飛雨度點點著銀花

其四

遊女江皋上纖裳霧雨垂那能惜羅襪緩步踏春泥

夢澤集卷十

欽定四庫全書

夢澤集卷十一

明 王廷陳 撰

詩

燕京元夕曲

大道朱樓錦繡圍
歌鍾萬戶競春輝
樓前火樹嶙峋照
化作紅雲片片飛

其二

香車一一渡星橋翠袖雙雙引玉簫
但訝遊人爭辟易
不知夫婿漢嫖姚

其三

萬柳千花巧自妝春風吹散綺羅香
誰教月色模糊甚
惱殺幽并遊冶郎

送人遊越中五首

寺閣岩樓望不稀越王城畔早春歸
尋溪放舸煙花豁
立馬聽鶯醉落暉

其二

雁蕩汀洲天漢流
奔雷噴雪下龍湫
北風晴霧濛濛合
倚石捫蘿迥自愁

其三

華頂晴登挹彩霞
雲君仙子列如麻
琅玕芝草幽難掇
來往時瞻白鹿車

其四

合沓巖巖生紫煙
赤城遙見石梁懸
攀松帖岸窺難下

鶴駕鸞駮度羽仙

其五

挂席東南萬里迴海潮八月拍天來巨鼇一湧三山動
五色樓臺中自開

送李中丞三首

晴旭煙郊列騎迴中丞春旆拂梁臺金符玉節層霄下
甸雪河冰萬里開

其二

九曲風濤迥自驚
黃河天畔繞孤城
中宵笳鼓揚帆渡
萬古鯨鯢避楫行

其三

夜月轅門鐵騎寒
龍旗千隊指樓蘭
丈夫莫負封侯骨
破敵歸來望玉鞍

偶題三首

莫謂娥眉不受憐
宮中元自妬嬋娟
亦知白壁終難擲
何事青蠅但屢煎

其二

洞庭南望結愁雲
杜若江皋祇自芬
賈誼上書憂漢室
屈平投賦弔湘君

其三

寶匣誰當垂拂拭
龍文夜夜斗牛間
可憐日月雙埋劍
實想雲霄一賜環

贈董氏兄弟

我愛謝家雙玉樹
雙凌雲日散光輝
佇看北極隨鶴鷺

倘念南山老巖薇

聞恩詔有感四首

天書十道出楓宸
紫極回瞻御氣新
浩蕩遙緘三殿雨
霑濡長作萬方春

其二

姬年八百未為多
虞日謳歌許更過
已擲風雷開蟄戶
更添江海接恩波

其三

天地重開日月移幽人感激中興時
湘纍莫漫題芳杜
漢皓何須詠紫芝

其四

春風翻自朔方回恩澤遙從北海來
涓滴須令沾涸轍
吹噓合遣到寒灰

夢澤集卷十一

欽定四庫全書

夢澤集卷十二

明 王廷陳 撰

文

仕始

陳子守淞別王子王子曰仕之始也不可不慎也夫君子庸以驗術矣履以稽終矣造以考成矣入以要至矣陳子曰請問焉王子曰定方以志濟事以才固守以力

含美以幾終始之道也陳子曰請問焉王子曰端委嫌
於似變化神於交向往起於微性真奪於勢是故貞者
以獲戾也佞者以蒙澤也鮮弗惑矣故曰定方以志也
敏者集乎殷也强者勝乎重也通者乘乎時也振者懲
乎弊也故曰濟事以才也夫傑而持摧之或折矣奮而
立撼之或仆矣怙而居誘之或趨矣是故相時而逾汙
也適成而寢弱也故曰固守以力也毀階於譽忌啟於
妍怨深於劣夫君子明而却視實而虛中矯而遜出華

而襲處故曰含美以幾也夫志定非才不濟矣才濟非力不固矣力固非幾不全矣故曰終始之道也

明天

胡子敏而淑惠而整子而和疏達而信邃而坦國人曰世之幹也邦之貞也楚之哲也天佑之人庸之試不利得令而往國人曰天何常人何公胡子之良而胡塞之也王子聞之曰胡子有是也足矣夫人之惜也天將異施夫執情以逆天見之拘也刻運以盡神說之膚也膠

常以憤變臆之固也故變則不齊不齊則神神則不測
不測則天不齊終一不測終明是謂終定乎人故天為
人宰人為天心故愛憎屯亨其道一也是故千夫羨之
不如一人惜之夫澤浮而羨羨為屯足道屈而惜惜為
亨根故君相法天以用天下矣哲人法天以治其身矣
是故抑以試量量裕而升約以見貞貞結而遂艱以養
譽譽彰而拔咈人以神其道是謂君相之法不盈其亨
不戚其屯唯確唯一登於大成是謂以天治身

力難

子延令麻城聞命愀然曰予何以堪王子曰子何懼子地也夫不度之國習偽之民漸靡之俗君子之所憫也志士之所力也夫憫以立仁矣力以立功矣仁立者戴矣功立者錄矣故治難而姦廣者君子之資而志士之藉也夫棄惡無仁避難無功無仁無功民且疾之將疾民乎故善治者無擇而有方矯時弛術可以濟矣夫多防啟伺急繩導踰深文滋巧縷約益亂故杜伺以忠閉

踰以度屈巧以信一亂以簡忠所以存也度所以節也
信所以孚也簡所以持也果而能忠果而能度果而能
信果而能簡忠以撤防度以緩繩信以寬文簡以省約
是謂矯時弛術其何不濟夫身可儀民乃式志不携績
乃成不惑浮言守乃確懼不克衷乃審故曰子地也子
何難焉夫族而解者刃之利也革而貫者矢之良也痼
而愈者醫師之神也夫歷險遠智負重奮勇遭敵裕謀
矣聞之云始之戚戚其終也愉

闡來

周子名季鳳字公儀號來軒石磯子以語克躁子克躁
子曰唯唯予聞之矣夫來有二道焉為世重也為我重
也我足世需則來有不能為世重者乎不然有能為世
重者乎世足我庸則來有不能為我重者乎不然有能
為我重者乎夫韶之致鳳也是鳳為韶也重也鳳之儀
韶也是韶為鳳也重也故為韶也重者為世重之謂也
為鳳也重者為我重之謂也故察於此二者可以知人

矣是故憫覆而拯者聖人之仁也度德而進者君子之
審也昭亂而逝者達士之潔也臨難而避者儉人之戾
也非分而據者貪夫之溺也聖人於是乎以成化君子
於是乎以立功達士於是乎以令終儉人於是乎以儉
事貪夫於是乎以蹈逆於來之道有察不察者也是故
貞以成德智以辨微脩以永世儉以遠危察乎二重之
道而履之無違將有在於公乎石磯子曰然夫貞則動
以正矣知則會不爽矣脩則行必飭矣儉則志不淫矣

是能為世重是能為我重聞子之言庶幾知公矣

致辭

惟歲丁丑惟時仲冬惟日晦惟劉母初度惟子姓跪爵
惟姻婭咸造惟史氏致辭曰聽予言罔弗聰予乃誕悉
帝之秘俾罔惑惟帝有嘉罔不錫爾衆惟衆弗迪庸弗
迓厥修曰帝傾厥敷惟爾承乃心乃克自羞乃罔與厥
衷帝庸錫之嘉惟命罔不修在德惟錫罔浮浮乃誕弗
祥庸益厥罰惟運罔淳罔在季惟人乃古昔弗穀罔弗

折季乃迪厥躬乃罔弗受厥嘉弗穀乃弗折迪罔受厥
嘉匪厥常惟明信厥常罔慄慄於厥愆惟施靡不定在
初罔可襲爾庸殫厥心惟施罔易惟爾感惟劉哲自昔
暨有家相厥夫子生生罔不欽乃底厥成撫乃子姓惟
仁罔有陰厥生子姓惟母恃胥以康戚踈胥宜曰良克
綏厥居帝乃錫嘉曰其永生慎乃度母惑累乃績母墜
確乃常毋沈於靡經乃罔不修越耆躋耄罔艱於履罔
眊於視罔憤憤於志息罔索惟充毋庸襲命其自凝尚

其期顧哉予弗匿厥指尚聽予其有永

倅全

張子倅全乞言於王子王子曰若知仕者之難乎將長吏乎抑倅者乎張子曰長吏哉萃州之政而盈縮焉非敏不濟萃州之人而旌別焉非明不察萃州之僚而率先焉非和莫協故長吏政之總也民之則也僚之式也莫難焉夫倅聽而言象而行俞而行否否而止也是故言州之理倅也逃矣王子曰否意而施無折也虞善而

圖鮮不竟焉長吏曷難夫倅為之或厄其後矣委之受命而食愧焉是故紆徐曲折託之長吏而達之民不隱也民用賴焉弗識惠所自不暴也長吏專其良不忌也是不亦難乎故倅之道有三一曰同寅之恭二曰惠民之誠三曰推善之量夫恭則不隱誠則不暴量則不忌知斯三者可以倅矣豈惟倅哉施於天下將裕乎

歸省

徐子歸王子曰榮哉茲行徐子曰何哉子所云者吾以

懼焉而敢榮也夫榮者情之係也幸者機之適也感者
仁之厚也報者施之稱也情莫榮於信衷機莫幸於獲
間仁莫大於恤其家報莫難於恩之異吾無以勝此矣
而叢集焉戴惠而往還無以為覲緘澤而私公無以為
啟宜子之榮之而予懼也快其蒙是歸以眩屬踈者趣
之汙也人親也者冀其子之弟也而亟歸以光望之薄
也子何榮焉王子曰善夫厚世之紀也人之經也國之
命也訓世以偷其紀壞導人以競其經亂立國以貪其

命促往而復意之真也激而奮德之深也故為國者厚施以自封也敦俗以勸忠也則化溥矣化溥則功建功建則治成治成則名立子言善可以別矣徐子行

秘竒

張老神於數然於世無遇也問於夢澤子夢澤子曰天道忌彰神道忌明人道忌露物道忌華乘而除之其道彌光故實者或侈其衷矣浮者或恡其慧矣佞者或遺其履矣劣者或淫其社矣闇者或相其行矣覺者或違

其覩矣此六者數之為也乘除之道也故天道貴微神道貴妙人道貴襲物道貴質存也闔其門發也諱其端運也藏其輪竟也化其積夫天神人物之道畢於數矣知而違之有不值其忌者乎夫子之於數也悉其定不滯其交窺其跡不眩其宰天地以子不得隱其度鬼神以子不得隱其情人以子不得隱其紀物以子不得隱其態夫測深析渾好揭玄以示者忌之歸也宜子之不達也是所謂乘除者也是故君子冲以為體直以為用

遽以為宅默以為章恍惚以為象希夷以為形以索以存不苟示人百福其凝夫子信之矣

疾瘳

王子謂仵子曰子疾且瘳矣何為乎歸仵子曰子疑予乎予語子予聞之病國者六病君者八病民者四淫爵褻刑毀階裂憲離德竊權六者病國莫大焉比佞疾貞玩戎親險樂田厭政損威最慝八者病君莫大焉效逆捐廉滅義嗜利四者病民莫大焉故君子之仕也非以

榮而已將以瘳之也吾聞之救過之餘不可以拯累咎
吝者不可以造吉習行者使負鮮不蹶矣今吾有大疾
五不見於色慵廢業直忤人亢戾俗言泥古潔取謗夫
仕者之謂何將上下之疾是務去而予身之不瘳其何
能為予之歸也屏慮而寂處勤作而和衷拔固而行恕
其愈也而復焉夫行意者不畏議濟大者不輕以試矣
予先大夫曰裕而施毋範人以愆其允有功于弗敢辱
先大夫之命王子乃謝曰予鄙人誠不足以知子

功慶

百粵之役周君從焉既平以功自千戶擢君指揮鄉之人曰是能榮吾里也往賀之長者令王子言王子乃言曰吾聞之會以行志志以立功功以差賞賞以趨世故上世無功中世有功下世幸功何謂無功分均無競道厚無機無競無勝亦無負也無機無襲亦無喪也是謂無功何謂有功智為世謀勇為世力謀以屈愚亦以崇秩也力以集事亦以庇身也是謂有功何謂幸功附貴

為援行賂為藉倚文為偽級以勢攘賚以貨豐行者亡
居者封是謂幸功故無功之世鮮不亂矣有功之世鮮
不治矣幸功之世鮮不亂矣三者時之為也苟非賢豪
之士其不免矣君也旅進而不失其貞居恬而不棄其
會拜錫而不雄其成進不失貞正也恬不棄會智也錫
不雄成謙也正以始之智以為之謙以終之是謂有功
矣要之不苟趣時者其貞賢豪之士哉是故其成可賀
也

歸歸

胡子國華之以疾歸也國人疑之曰避咎而規全匪國是圖而虞其軀衆而效之國何利焉王子謂胡子吾與也宜令胡子之志諒於人也乃為之言曰吾聞諸君子曰進退身之準也治亂時之會也得失道之符也故君子道以制時而進退其身孰能踰焉不然無則無則必亂身且亂焉其能濟乎是故崇聖錄良伐奸寵惠君子於是乎躋秩而協諸謀以贊治也更怠法存上冒下直

君子於是乎犯忌觸危力而振之以拯亂也患釀諫賢
已弱勢強君子於是乎卷術拈機而去之以守正也夫
治則贊亂則拯不能則去道之中也治不能贊亂不能
拯不能而不去世之乖也夫醫生人之術也主人疾召
醫而視之其不能也而請去之俟主人之他召也是誠
於生人者也夫御史官有醫之道者也故留者不盡黜
去者不盡不韙國而皆留者之不盡黜也其為國之不
韙也不亦多乎國而有去者之不盡不韙也其為國之

黷也不亦多乎夫譽怙者以抑競也人猶踰之矧誹怙
以助競乎於是疑者釋然賦詩而別胡子聞之曰王子
之言過矣王子之言過矣予實疾

重師

曾子如陳王子謂之曰嗟乎師道之廢也秩之弗崇易
以陵勢之弗張易以抗上陵而下抗故居者易焉夫士
國之材也師教之有司舉之天子官之故師材之源也
易以居焉何以教教之失則何以舉舉之匪人何以官

官之無良何以治故治罔功由官否也官無良由舉冒也舉匪人由教弛也故師也莫重焉易焉以居昧其職也予聞之師道有五一日正習二曰勤業三曰介守四曰崇恬五曰篤善夫言侈而道費象莊而行邪枝繁而本剥是以正習之為貴遊以棄時情以玩歲是以勤業之為貴義接而賄行與市焉而以訓誰則能之是以介守之為貴羣而修以俟舉也失者覩獲羨生焉其趨乃壞是以崇恬之為貴夫右賢左劣植率仆梗乃能勸矣

是以篤善之為貴行此五者以教可以淑士矣士淑舉用以臧舉臧官用以良官良治用以昌故師也莫重焉其何以易茲行也惟吾子之振之也夫陳大國也子振之四方則之師道其興乎

申贈

許刺史顏子行其友吳子劉子儲子王子熊子往送之咸贈以言吳子曰許其生乎夫許梁之近地也自吾過之見其民病矣曰勢者不法將毒是滋而守者弱莫之

與捍也非惟莫捍且縱之非惟縱之且利焉夫剥子以
食盜非仁媚惡以覆身非勇非仁莫恤非勇莫力能以
守乎子仁而勇者也茲行也生許必矣劉子曰夫許上
有郡下有邑夫事上者下之則也虔於大吏以令其屬
其誰不從儲子曰吾聞之草俗者不恤其議立則者不
虞其梗謀大者不速其成子志之也熊子曰請無勗其
優效其乏夫任力者以奮攻者也盡情者以深蔽者也
故不務濟而急聞敗之道也君子剛以柔克明以晦神

是故往無不利四子言畢王子趨而進曰美哉言乎吾
無以益矣吳子之言惠而子劉子之言順而理儲子勵
其作熊子邃其思顏子服之萃茲衆美克其剛蓄其明
振其勇敷其仁以和其上下懲其習俗臨其民人許也
幸哉有茲刺史

振弊

王子謂徐子曰夫懷遠弊矣承弊者必力子行慎哉子
之力也何憂乎弊子之不力雖弗弊其將及夫徐子志

子言審而謀儉而欲正而度諳而動毋率情而揭隙毋
瘁衆以澤身毋夷介以服汙毋競俗以隳義故覲美虞
危精微竭矣抑汰崇貞生植溥矣守則草踰紀綱立矣
致軀以遵職冒罰以寬民措設理矣故畧而寡思足以
勗攻侈而浚財足以喪守怠而解法足以撼衆枉而趨
便足以屈道是故約而出之存乎審裕而蓄之存乎儉
介而持之存乎正次而舉之存乎諳運之不已存乎力
子之力也獨懷遠賴哉而及者廣矣且子行也以親老

故夫以官榮者薄矣力乃職以令名貽焉榮也不既多乎

惠遠

周子按貴州別王子王子曰今夫伊邇之區閑法而昭情窮陬之生政不易逮長之不仁有忿焉誰與號之有號焉誰與理之夫忿而不理且梗衆也梗而深忿大亂乃生此無故遐者易亂棄以重之也今夫一職曹居懷者知忌寡務參謀妄者知審獨任上制肆者知畏合衆

而監假之大柄非人而遣其害滋多此無故專者易恣
權以重之也今夫矩之而循習化者也威之不悖既植
者也衆之不率大師克之不務與息亟矩而威焉夫久
躍之獸卒而羈之狂頓必矣此無故新集者易恐擾以
重之也夫百粵遐矣子職孰專焉且新集之衆也慎之
哉夫遐而棄不可以廣權而恣不可以任夷而士責之
繫而敵驅之不可以寧故吏否必擊其將濟乎其惠暨
於下矣事舉必咨其將濟乎其思協於衆矣覺附必輯

其將濟乎其隱賴於上矣夫惠戴之結也思啟之端也
隱命之係也三者國之紀也子正而能讓簡而安有此
德以施三紀其何難焉

禮成

歲戊寅春正月周王使李士光來朝成禮而歸問於王
子王子曰子知子役之重乎予語子昔先聖王之有天
下也參之化運以準天也昭之軌物以明民也準以象
微明惠弗哲下之於民民焉宅之以永世也仁於有邦

諸侯是比同姓之國猶與暱焉以庇本也是故歲以標
紀紀以閱厯掄正而崇終盡則始與天下新於是乎變
定而候弗爽揭則以命亟易而有常於茲有生惟正朔
是依莫或逞焉於是乎志定而動弗爽受朔之期外內
之臣奔走焉聽新政也於是乎度定而承弗爽子也朝
正而來役莫重焉周同姓之國也抑子於周復戚焉是
天子之所暱也故守禮弗失如時而至藉主之恂者行
乎其順也觀則於天王還白其君發乎其忠也翊主惟


力務與時新究之於孔叔弗溺其襲為諸侯先兆乎其倡也

績成

許子為御史三年而績成其僚友往賀焉令予言績成之道夫事有宰理是已時有制已是已賊理而圖曰吾且集焉者事役也失已而趨曰吾苟濟焉者時使也君子弗為也夫事紛而理約時靡一而已有常也是故君子務宰也務制也蓄之以為發也和之以為直也通之

以為定也發由蓄以為弗膚也和由直以為弗撓也定
由通以為弗固也其觸也將有建也猶思焉其當也乃
建焉何居取諸蓄以為發也其激也將有奮也猶存焉
其平也乃奮焉何居取諸和以為直也其變也將有執
也猶審焉其適也乃執焉何居取諸通以為定也是之
謂宰者立而制者獲也宰立者以役事非事役也制獲
者以使時非時使也庸是試焉而折焉成也其不庸是
試焉而成焉敗也故正而弗成君子弗忌成而弗正君

子弗趣也許子正且成矣茲舉也匪賀其成賀其以正成也



夢澤集卷十二